



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Zamoren. Episcopo.

urn:nbn:de:hbz:466:1-20006

in electione processerit, voluit in continenti probare; decretum producens in medium quorundam etiam ex eis qui videbantur parti alteri consentire, manibus roboratum; & quorundam Abbatum proferens literas, quæ quo Decan. Cantor, Subdecan. & magister Vv. de Talebore in electione ipsa post publicationem ejus se consentire confessi fuerant, continebant. Adjecit etiam quòd cum electores ipsi die innovatæ compromissionis in te unanimiter convenissent, & electio ipsa fuisset per eundem Archiepiscopum approbata, Archiepiscopus ad Capitulum veniens, quod factum fuerat, tacito tamen nomine tuo, Canonicis intimavit: qui se id gratum habere unanimiter responderunt, & ut electio non publicaretur eadem die, ab Archiepiscopo postularunt, dantes ei osculum pacis quòd ab electione ipsa nullatenus resilirent, immo eam omnes & singuli defensarent. Quia verò postmodum propter contradictionem Comititis infra civitatem Pictaven. te non audebant publicè nominare, in locum tutum & idoneum convenerunt, quod in civitate fecerant publicantes. Vnde cum in die innovatæ compromissionis electores convenerint, & nisi per Decanum & partem suam steterit, quod fecerant parati fuerant publicare, ac cum ex literis eorundem Abbatum constiterit quòd Decan. Cantor, Subdecan. & magister Vv. de Talebore electioni se post publicationem etiam confessi fuerint consentire, exceptiones ad adversa parte propositas sibi asseruit nullum præjudicium generare. Præterea Subdecan. & magister Vv. in ipsa quæstionis examinatione ad fratrum concordiam sunt reversi. Verùm Vv. de Helemofina dilecti filij O. Pictaven. Comititis procurator præfato I. monacho assistenti proposuit quòd quia electio ipsa post appellationem nec in statuto termino nec assignato loco fuerat celebrata, & quoniam assensus Principis non fuerat postularus in ipsa, & persona tua Principi erat ex certa ratione suspecta, erat penitus irritanda. Ad quod fuit ex altera parte responsum quòd non per eam steterat quòd minus certo loco & tempore electio publicata fuisset, quæ ante appellationem fuerat celebrata, & quòd assensus Principis non erat de consuetudine Pictaven. Ecclesiæ aliquatenus postulandus; qui te

& fratres tuos, non ut hostes, sed ut devotos suos in Pictavia tolerarat. Nos igitur auditis quæ hinc inde proposita fuerant, electionem fuisse canonicam cognoscentes, & de persona idonea celebratam, eam de communi fratrum nostrorum consilio per sententiam confirmavimus, & te sequente die ministerio proprio in Episcopum curavimus consecrare. Ne igitur super his aliqua in posterum dubietas oriatur, sententiam ipsam auctoritate apost. confirmamus, & præsentis scripti patrocinio communimus. Nulli ergo &c. Datum Laterani vij. Idus Aprilis.

ZAMOREN. EPISCOPO.

Cum secundum Apostolum, qui altario servit, de altari vivere debeat, & qui ad onus eligitur, repelli non debeat à mercede; patet à simili ut clerici vivere debeant de patrimonio IESU CHRISTI, cujus obsequio deputantur, ut ipsa nominis ratio persuadet. Cum enim à clericos, quod est fors, vel hereditas, Clerici appellentur, quia in sui ordinatione vel assumuntur in hereditatem Domini, vel assequuntur hereditatem in ipso, ut verè possint psallere cum Propheta, *Dominus pars hereditatis meæ*, dignum est ut Ecclesiæ stipendiis sustententur, in qua & per quam divinis obsequiis ascribuntur. Licet autem prædecessores nostri ordinationes eorum qui sine certo titulo promoventur, in injuriam ordinationum irritas esse voluerint & inanes; nos tamen benignius agere cupientes, tamdiu per ordinatores vel successores ipsorum provideri volumus ordinatis, donec per eos ecclesiastica beneficia consequantur; ne forte clamores Clericorum pauperum, quos in aures Domini Sabaoth credimus introire, indurata facie negligere videamur. Inde est quòd cum dilectus filius * Bernardus lator præsentium, à G. bonæ memoriæ prædecessore tuo, sicut asserit, in officium fuerit subdiac. natus nullo præsentante promotus, nec ullum sit ecclesiasticum beneficium affecturus; fraternitati tuæ per apostolica scripta mandamus, quatenus si eum * cum dilectis filiis I. Decano, N. magistro scholarum, & Helia Canonicis Zamoren. quibus examinationem ipsius duximus committendam, idoneum esse repereris, & ecclesiastico beneficio non

Vide veteris schedas monasterij Corona apud Bellum in Hist. Episc. por. Pictav. num. 67.

Epist. 76. Ut sine titulo ordinato clerico provideatur. Cap. Cum secundum Apostolum, de præbendis & dignitat.

* In tertia Collectione & apud Gregorium IX. legitur, dil. f. G. Later.

* In tertia Collectione & apud Gregorium hæc habentur: mandamus quod si eum dil. f. quibus ex, ip. de

indignum, tamdiu ei vitæ necessaria congruè subministres, donec per te in Zamoren. Ecclesia vel in alia fuerit competens beneficium ecclesiasticum afsecutus; sciturus pro certo quòd si per examinationem illorum fuerit repertus idoneus, & tu ei juxta mandatum nostrum neglexeris providere, cum hoc nobis per eorum literas innotuerit, ad id exequendum te per distinctionem ecclesiasticam compellemus. quia sicut nolumus injusta præcipere, sic cum justa præcipimus, volumus efficaciter exaudiri. Datum Laterani III. Nonas Aprilis.

DECANO ASTORICENSI.

Epist. 77.
Vt sic decessorum suorum iuribus contentus, nec gravet suum Capitulum.

Dilecti filij Capitulum Astoricen. nobis intimare curarunt quòd cum tu olim ad apostolicam sedem accedens, assereres dignitatem Decanatus de novo fuisse in Astoricen. Ecclesia institutam, & ideo in ambiguo remanebat quid ad tuum officium pertineret, rescriptum ab eadem sede super hoc reportasti quòd in hac ambiguitate Astoricen. Ecclesia consuetudinem suæ Metropol. sequeretur, ubi ex speciali consuetudine Decanus multis se gaudet privilegiis decoratum. Vnde quia eadem Astoricen. Ecclesia dignitatem Decanatus à longis retro temporibus noscitur habuisse, licet qui eoungebatur honore promoveretur aliquando & destitueretur pro Episcopi & Capituli voluntate, nec Decani sed Prioris nomine vocaretur, secundum consuetudinem ferè omnium Ecclesiarum Hispaniæ, quæ tunc temporis ibi vigebar; cum etiam alius Decanus ibidem fuerit institutus, Decanus re ac nomine appellatus, literas illas per falsi suggestionem & suppressionem veri asserunt impetratas; nec te debere per illas ali-quod commodum reportare, sed carere potius taliter impetratis. Eapropter per apostolica tibi scripta præcipiendo mandamus, quatenus, si vera sunt quæ dicuntur, eo jure illaque potestate, quibus antecessores tuos usos fuisse constiterit, maneat omnino contentus; nec amplius de cetero in præjudicium Episcopi vel Capituli præsumas exigere; immo si quid fortè amplius recepisti, penitus id in pace dimittas. Quòd si fortè nostro mandato acquiescere nolueris, noveris nos ven. fratri nostro Episcopo & dilectis filiis Abbati de Carrazedo & Decano Zamoren. injunxisse ut te ad prædicta mo-

neant & inducant, & si opus fuerit, per censuram ecclesiasticam, appellatione remota, justitia mediante compellant. Datum Laterani vj. Kalend. Aprilis.

Illis scriptum est super hoc.

MAGDEBURGEN. ARCHIEPISC.

EX parte Pragen. Ecclesiæ in audientia nostra fuit propositum quòd cum H. quondam Pragen. Episcopus fuisset viam universæ carnis ingressus, D. Clericus in eorum Ecclesia præter electionem Capituli per laicalem potentiam se intrusit, licet nec mores nec vita ei ad obtinendum tantum officium suffragentur. Volentes igitur eadem Ecclesiæ paterna sollicitudine providere, fraternitati tuæ per apost. scripta mandamus quatenus ad locum idoneum evocatis qui propter hoc fuerint evocandi, si tibi constiterit de prædictis, memoratum Clericum ab eadem Ecclesia omni contradictione & appellatione postposita prorsus amoveas, & ab officio beneficii que suspensum, ad nostram non differas præsentiam destinare. Canonice etiam Pragen. eligendi sibi Pastorem idoneum juxta formam canonicam concedas auctoritate nostra liberam facultatem. Sciturus nos dilecto filio nobili viro Duci Boëmiæ per apost. scripta mandasse ut tibi super his viriliter & potenter assistat, & prædictam Ecclesiam non patiat ab eodem Clerico teneri diutius occupatam. Datum Laterani vj. Idus Aprilis.

Epist. 78.
Vt à laicis intrusum amoveat, aliumque Pragensem Episcopi copum canonicè eligitur.

Canonice etiam ipsius Eccl. scriptum est ut illo amoto per Archiepiscopum, ad canonicam electionem procedant.

AVXITAN. ARCHIEPISCOPO.

QVANTO modernis temporibus, inimico humani generis suggerente, malitia hominum solito plus excrevit, tanto sollicitiori diligentia nos providere oportet ut ea quæ in Ecclesia Dei minus ordinatè & contra normam ecclesiasticam attentantur, deliberatione provida corrigantur. Ad audientiam siquidem apostolatus nostri pervenit quòd Clerici tuæ provinciæ nimis aviditatis fervore succensi, in Ecclesiis, quas propter insufficientiam suam, cum sint minus idonei, per Prælatos obtinere non possunt, per seculares potestates quasi vio-

Epist. 79.
Vt Clerici qui se à laicis intrudi curant, puniantur.